

MABASA BA SA BIBLIA NGA SI MARIA ATONG AMPOAN?

Sa Biblia wala kay mabasa bisan usa nalang ka bersikulo nga gisugo kita mag-ampo ngadto sa mga santos o mosimba ngadto sa mga santos. Mao nga wala kay mabasa sa Biblia nga magsimba ka o mag-ampo ka ngadto ni Maria. Dili gayod siya angay nimong ampoan o simbahon kay siya tawo raman sama kanato.

Aron masabtan gayod nato pag-ayo nganong dili si Maria angay nga ampoan, kinahanglan nga masayran nato unsa gayod ang gisulti sa Biblia mahitungod kang Maria. Kinahanglan nga mahibaloan nato unsa man gayod ang role o papel ni Maria sa dihang nagpakatawo si Jesus.

Lucas 1:28-35 “Miadto ang anghel kaniya ug miingon, “**Paglipay! Ang Ginoo nag-uban ug nagpanalangin kanimo pag-ayo!** (29)Nalibog pag-ayo si Maria sa pagkabati niya sa mensahe sa anghel. Ug nagpalandong siya kon unsay kahulogan sa iyang mga pulong, (30)Miingon ang anghel kaniya, “Ayaw kahadlok Maria, kay gikahimut-an ka sa Dios. (31)Magmabdos ka ug manganak ug lalaki, ug nganlan mo siyag Jesus. (32)Mahimo siyang inila ug tawgon siya nga Anak sa Dios nga Labing Halangdon. Ang Ginoong Dios maghimo kaniyang hari, sama sa iyang kagikan nga si David. (33)Mahimo siyang hari sa mga kaliwat ni Jacob hangtod sa kahangtoran ug dili matapos ang iyang gingharian! (34)Si Maria miingon sa anghel, “Ulay ako, busa unsaon man pagkahimo niini? (35)Ang anghel mitubag,” Mokunsad kanimo ang Espiritu Santo, ug magpabilin ang gahom sa Dios diha kanimo. Tungod niini, ang balaan nga bata tawgon nga Anak sa Dios.”

Kining Lucas 1:28-35 naghigut kini mahitungod ni anghel Gabriel nga nagpahibalo kang Maria nga magmabdos siya, ug manganak ug lalaki ug paganganlan niyag Jesus. Miingon si anghel Gabriel kaniya diha sa bersikulo 28 nga nag-ingon “ **Paglipay! Ang Ginoo nag-uban ug nagpanalangin kanimo pag-ayo**”. Mao kining porsyona o bahina ang gigamit diha sa unang bahin sa pag-ampo nga “ **Hail Mary.**”

Kining bersikulo 28 nga maoy gigamit diha sa unang portion sa “**Hail Mary**” dili kini usa ka pag-ampo kondili usa kini ka greeting o pagtimbaya ni anghel Gabriel ngadto kang Maria. Ug ang sunod nga bahin sa pangadgion nga “**Hail Mary**” mabasa nimo sa Lucas 1:42 nga nag-ingon “**Bulahan ka sa tanang mga babaye! Bulahan ang bata nga imong ianak.**” Kining bersikuloha kon imong basahon sa bersikulo 3 masabtan nimo nga dili usab kini usa ka pag-ampo kondili usa kini ka greeting o pagtimbaya ni Elisabet ngadto kang Maria.

Sa bersikulo 34-35 miingon si Maria ngadto kang anghel Gabriel “*Ulay ako busa unsaon man paghimo niini?*” Mitubag si angel Gabriel kaniya nga nag-ingon “*Mokunsad kanimo ang Espiritu Santo* “. Ang pag-ingon “*Mokunsad kanimo ang Espiritu Santo*” – kini nagpasabot nga si Maria magmabdos dili tungod sa tawhanong pamaagi kondili pinaagi sa gahom sa Espiritu Santo. Mao nga mabasa nimo sa Mateo 1:20 nga ang pagmabdos ni Maria lalang gayod sa Espiritu Santo.

Mateo 1:20 "Samtang naghunahuna siya niini, mipakita kaniya ang usa ka anghel sa Ginoo pinaagi sa damgo ug miingon, 'Jose, kaliwat ni David, ayaw kahadlok sa pagpangasawa kang Maria kay siya magsabak pinaagi sa gahom sa Espiritu Santo."

Kining mga bahina sa kasulatan klaro nga nagpasabot kanato nga si Maria magmabdos kang Jesus pinaagi sa gahom sa Espiritu Santo.

Ang pangutana mao kini: DIHA NA BA SI JESUS SA WALA PA SIYA IPANAMKON SA TAGO-ANGKAN NI MARIA?

Juan 1:1-3 (MBB) Sa wala pay nabuhat bisan unsa, ang Pulong diha na. Ang Pulong uban sa Dios ug ang Pulong Dios. Sukad pa gayod sa sinugdan ang Pulong uban sa Dios. (3) Pinaagi kaniya gibuhat sa Dios ang tanan ug walay bisan unsa sa tanan nga nabuhat nga dili pinaagi kaniya."

Ang bersikulo nag-ingon “**Sa wala pay nabuhat bisan unsa, ang Pulong diha na. Ang Pulong uban sa Dios, ug ang Pulong Dios**”– ang Pulong nga Dios nga gihigutan dinhi nga bersikulo nga uban sa Dios sukad pa sa sinugdan mao si Ginoong Jesus. Mao nga mabasa nimo sa bersikulo 14 nga ang Dios nga gitawag ug Pulong nahimong tawo ug mipuyo uban kanato.

Juan 1:14 “Ang Pulong nahimong tawo ug mipuyo uban kanato. Nakita namo ang iyang himaya nga puno sa grasya ug sa kamatuoran. Kini ang himaya nga iyang nadawat ingon nga bugtong Anak sa Amahan.” Ang bersikulo 14 nag-ingon “*Ang Pulong nahimong tawo*” – Ang Pulong nga nahimong tawo walay lain, kini nagpasabot kang Ginoong Jesus. Kini nagpasabot nga dili siya tawo, apan nagpakatawo siya ug mipuyo uban kanato. Busa, dayag nalang kaayo nga sa wala pa siya magpakatawo diha na siya, kauban na siya sa Dios Amahan sukad pa gayod sa sinugdan. Ang pag-ingon sa bersikulo 14 nga “*Ang Pulong nahimong tawo ug mipuyo uban kanato*” – kini nagpasabot sa pagpakatawo ni Cristo. Kini nagpasabot nga diha na si Cristo sa wala pa siya ipanamkon sa Espiritu Santo sa tago-angkan ni Maria. Kauban na siya sa Dios Amahan, wala pa lang siya magpakatawo. Sa unsa mang paagi nga ang Pulong nga Dios (Jesus) nahimong tawo? Kini pinaagi kang Maria. Magmabdos si Maria sa gahom sa Espiritu Santo, ug iyang ipanganak aron mahimong tawo ang Pulong ug nganlan siyag Jesus. Mao kini ang hinungdan nganong si Jesus nagbaton sa duha ka kinaiyahan (two natures): Diosnong Kinaiyahan (Divine Nature), ug Tawhanong Kinaiyahan (Human Nature). Mao nga mabasa nimo sa Biblia nga si Jesus tawgon nga Son of God (Anak sa Dios –ug Son of Man (Anak sa Tawo Ang pagtawag kaniya nga Son of God (Anak sa Dios) - kini nagpasabot sa iyang *Diosnong Kinaiyahan*, ug ang pagtawag kaniya nga Son of Man (Anak sa Tawo) – kini nagpasabot sa iyang *Tawhanong Kinaiyahan*. Nakabaton si Jesus sa *Tawhanong Kinaiyahan* kay natawo man siya sa usa ka tawo nga usa ka babaye nga mao si Maria. Kini nagpasabot nga si Maria inahan ni Jesus sa iyang pagkatawhanon, apan dili siya inahan sa iyang pagkaDios tungod kay sa wala pa si Jesus magpakatawo diha na Siyang daan. Kauban na Siya sa Dios Amahan sukad pa sa sinugdanan. Mao nga wala gayod kay mabasa sa Biblia bisan usa nalang ka bersikulo nga si Maria gitawag nga “Inahan sa Dios” (Mother of God). Ang mabasa nimo sa Biblia gitawag lang si Maria nga inahan ni Jesus.

Juan 2:1 "Sa ikatulo ka adlaw may kasal didto sa Cana sa Galilea ug didto ang inahan ni Jesus." Ang gigamit nga termino sa Biblia alang kang Maria “*inahan ni Jesus*” dili *Inahan sa Dios*. Ang pag-ingon nga “*inahan ni Jesus*” – kini nagpasabot nga si Maria tinuod nga inahan ni Jesus sa iyang pagkatawhanon, dili siya inahan sa iyang pagkaDios, kay wala pa matawo si Maria, si Jesus diha nang daan kauban na siya sa Amahan sukad pa sa sinugdan.

Juan 17:5 "Karon, Amahan, pasidunggi ako diha sa imong presensya pinaagi sa dungog nga akong gihuptan uban kanimo sa wala pa buhata ang kalibotan."

Kini nagpasabot nga sa wala pa buhata ang kalibotan, diha na si Jesus nag-uban sila sa Amahan.

Ang pangutana mao kini: NAN, NGANONG ADUNA MAY PAGTULUN-AN NGA NAGTUDLO KANATO NGA SI MARIA INAHAN SA DIOS (MOTHER OF GOD) NGA UNTA DILI MAN KINI MABASA NGA TERMINO SA BIBLIA?

Sumala sa libro nga giulohan “Truth Encounter” p.134 nagkanayon, “*The term Mother of God was used for the first time in the fifth century, during the Council of Ephesus (431AD)*”. Ug kini nga documento mabasa usab nimo sa basahon nga giulohan “Roman Catholic List of Heresies” p.1#5 nga nagkanayon,” *The worship of Mary,...and the use of the term “Mother of God” as applied to her, originated in the Council of Ephesus in 431A.D.*” Kini nagpasabot nga ang termino nga Mother of God nga gigamit alang kang Maria, nagsugod kini didto sa Conseho sa Efeso niadtong tuig 431AD. Ug niana usab nga tuig nagsugod ang pagsimba kang Maria. Kini nagpasabot nga before 431AD wala gamita sa Romano Katolikong Simbahan ang termino nga Mother of God alang kang Maria. Diha na kini magsugod sa dihang na-aprobahan na ang maong termino nga Mother of God didto sa Conseho sa Efeso niadtong tuig 431AD. Ug tungod niini migawas pa ang daghan pang mga pagtulun-an mahitungod kang Maria nga sukwahi gayod sa gitudlo sa Biblia. Sama pananglit niining mosunod nga mga pagtulun-an:

1. SI MARIA GIPANAMKON NGA WALAY SALA (Immaculate Conception of Mary)

This doctrine teaches that Mary was conceived without sin (that is, she had no original sin), and that she never sinned throughout her life.

Sa Biblia wala gayod kay mabasa bisan usa nalang ka bersikulo nga si Maria gipanamkon nga walay sala. Ang mabasa nimo sa Biblia nga gipanamkon nga walay sala mao lamang ang atong Ginoong Jesus, tungod kay si Jesus lamang ang natawo nga gipanamkon sa lalang sa Espiritu Santo. Kini nagpasabot kanato nga si Jesus ra ang gipanamkon nga walay sala kay siya raman ang gisabak nga lalang sa Espiritu Santo. Mao nga mabasa nimo sa daghan bahin sa Biblia nga si Jesus wala gayoy sala.

Hebreo 7:26 "Busa si Jesus mao ang Pangulong Pari nga makasangkap sa atong mga kinahanglan. Balaan siya. Wala siyay kalapasan o sala. Gilain siya gikan sa mga tawo nga makasasala ug gibayaw ngadto sa kalangitan."

Kining Hebreo 7:26 nagsulti kanato nga si Jesus wala gayod makasala. Bisan si Jesus nagpakatawo, apan wala gayod Siya makasala tungod kay ang pagsamkon kaniya diha sa tago-angkan ni Maria pinaagi man sa lalang sa Espiritu Santo dili man pinaagi sa tawhanong dugo. Tungod kay si Jesus raman ang gipanamkon pinaagi sa gahom sa Espiritu Santo, mao nga si Jesus ra ang gipanamkon nga walay sala. Wala kay mabasa bisan usa nalang ka bersikulo nga si Maria gipanamkon usab nga walay sala. Ang pagtulun-an nga si Maria gipanamkon nga walay sala (Immaculate Conception of Mary) usa ka dakong pagsupak sa gitudlo sa Biblia. Ang Biblia nagtudlo nga ang tanan nakasala.

Roma 3:23 "Nakasala ang tanan ug nahilayo sa himaya sa Dios."

Ang Roma 3:23 nagsulti nga "*ang tanang tawo nakasala*" apil niini si Maria, si Jesus ra ang exempted niini tungod kay natawo man siya sa lalang sa Espiritu Santo. Mao nga mabasa nimo sa Biblia nga si Jesus wala gayoy sala. Kon si Maria wala pay sala dili unta siya magkinahanglan ug Manluluwas. Apan mabasa nimo sa Biblia nga si Maria mismo miangkon nga duna siyay Manluluwas nga mao ang Dios.

Lucas 1:46-47 "Unya miingon si Maria, 'Nagdayeg sa Ginoo ang akong kalag, ug nagmalipayon ako diha sa Dios nga akong Manluluwas.'"

Si Maria miingon sa maong bersikulo "Nagdayeg sa Ginoo ang akong kalag, ug nagmalipayon ako diha sa Dios nga akong Manluluwas." – kini klaro kaayo nga nagpasabot kanato nga si Maria miangkon nga siya adunay manluluwas nga mao ang Dios. Kini nagpasabot nga si Maria mismo nagkinahanglan ug manluluwas. Kon wala pa siyay sala nganong nagkinahanglan man si Maria ug manluluwas? Dayag nalang nga si Maria sama ra usab kanato nga nagkinahanglan ug kaluwasan. Busa sama ra usab siya kanato nga makasasala. Mao nga dili gayod siya nimo angay nga ampoan o simbahon kay sama ra siya kanato nga makasasala nga nagkinahanglan usab ug kaluwasan. Mao bitaw nga sa Biblia wala gayod kay mabasa bisan usa nalang ka bersikulo nga si Maria gipanamkon nga walay sala.

Apan ang pangutana mao kini: NAN, NGANONG ADUNA MAY PAGTULUN-AN NGA SI MARIA GIPANAMKON NGA WALAY SALA NGA UNTA DILI MAN KINI MABASA SA BIBLIA?

Sumala sa libro nga giulohan "Truth Encounter" p.139 nagkanayon, "*Another dogma of the Catholic Church, one that glorifies Mary the most, is the dogma of the Immaculate Conception defined by Pope Pius IX on Dec. 8, 1854.*" Ug kini usab nga documento mabasa usab nimo sa "Roman Catholic List of Heresies" p.7# 36 nga nagkanayon, "*The Immaculate Conception of the Virgin Mary was proclaimed by Pope Pius IX in the year 1854AD.*" Kini nagpasabot nga ang pagtulun-an nga si Maria gipanamkon nga walay sala nagsugod niadtong December 8, 1854 sa dihang giproklamar ni Pope Pius IX ang maong pagtulun-an. Busa, dayag nalang nga kini nagpasabot kanato nga sa wala pa ang tuig 1854 ang Catolikong Simbahan wala magtudlo sa pagtulun-an nga Immaculate Conception of Mary, didto na kini magsugod sa dihang giproklamar na ni Pope Pius IX ang maong doktrina niadtong Dec. 8, 1854.

Lain pang pagtulun-an mahitungod kang Maria nga supak sa gitudlo sa Biblia.

2. SI MARIA MAO ANG TIGPATALIWALA (MEDIATRIX OF ALL GRACE)

Ang doktrina nga "Mary the Mediatrix of all grace" kini nagpasabot nga si Maria mao ang tigpataliwala tali sa Dios ug sa mga tawo. Sa laing pagkasulti manlalaban o advocate. Mao nga dili ka matingala nga diha sa usa sa mga pag-ampo sa Romano Catoliko in honor to Mary nga gitawag "Hail, holy Queen" mabasa nimo sa maong pag-ampo ang pulong nga nag-ingon "... *O most gracious Advocate.*"

Ang maong pag-ampo nga 'Hail Holy Queen' nagkanayon: Hail Holy Queen- sa Biblia wala gayod kay mabasa nga Si Maria gitawag Holy Queen. Naa sad diha sa maong pag-ampo nga nag-ingon: "Hail, our life" (Maghimaya ka, among kinabuhi) – kini nagpasabot nga sa maong pag-ampo nagtudlo nga si Maria mao ang atong kinabuhi, apan ang Biblia nagsulti: Si Jesus mao ang atong kinabuhi.

Juan 14:6 "Si Jesus mitubag , Ako ang dalan, ang kamatuoran ug ang kinabuhi. Walay kamaadto sa Amahan kon dili moagi kanako."

Naa sad diha sa maong pag-ampo nga nag-ingon: "Hail, our hope" (Maghimaya ka, among paglaum) – kini nagpasabot nga diha sa maong pag-ampo nagtudlo nga si Maria mao ang atong paglaum, apan ang Biblia nagsulti: Si Jesus ang atong paglaum.

1 Timoteo 1:1 "Gikan ni Pablo, apostol ni Cristo Jesus tungod sa pagbuot sa Dios nga atong Manluluwas ug ni Cristo Jesus nga atong paglaom."

Kini usa ka dayag nga pagtulun-an nga ang trabaho o posisyon nga alang unta kang Jesus ilang gipulihan kang Maria. Ug wala gayoy sala si Maria niining tanan, kay wala gani siyay kalibotan niining mga pagtulun-ana. Ang mga tawo nga nagmugna niini sila ang manubag sa Dios.

Naa pa gayod sa maong pag-ampo nga nag-ingon: "O most gracious Advocate" – kini nagpasabot nga diha sa maong pag-ampo nagtudlo nga si Maria mao ang atong manlalaban. Kini usa ka klarong pagsupak sa gitudlo sa Biblia. Kay sa Biblia si Jesus mao ang atong Manlalaban

1 Juan 2:1 "Mga anak, gisulatan ko kamo niini aron dili na kamo magpakasala. Apan kon may makasala, may manlalaban kita nga si Jesu-Cristo, ang matarong. Siya maoy mangatubang sa Amahan." Kining sulat ni San Juan nagsulti kanato nga si Jesus mao ang atong manlalaban ug tigpataliwala sa Dios ug sa mga tawo. Wala kay mabasa sa Biblia bisan usa nalang bersikulo nga si Maria atong manlalaban o tigpataliwala.

Tingali ang uban moingon: dili man si Maria tigpataliwala sa tawo ug sa Dios, kondili siya tigpataliwala kanato ug ni Cristo, mao nga dunay termino "To Jesus, through Mary". Mao ra gihapon nang estoryaha, wala gihapon kay mabasa sa Biblia bisan usa nalang ka bersikulo nga si Maria tigpataliwala sa tawo ug kang Jesus. Ang mabasa nimo sa Biblia si Jesus ra ang atong manlalaban.

Apan ang pangutana mao kini: NAN, NGANONG ADUNA MAY PAGTULUN-AN NGA SI MARIA MANLALABAN O TIGPATALIWALA SA DIOS UG SA MGA TAWO NGA UNTA DILI MAN KINI MABASA SA BIBLIA?

Sumala sa libro nga giulohan "Truth Encounter" p.141 nagkanayon " *According to the Roman Catholic Church, as taught in the encyclicals of Pope Leo XIII and Pope Pius X, Mary is the Mediatrix of all Grace.*" Kini nagpasabot kanato nga ang pagtulun-an nga si Maria mao ang tigpataliwala o manlalaban sa Dios ug sa mga tawo miabot tungod kini kay nagtudlo man niini si Pope Leo XIII ug si Pope Pius X diha sa ilang mga sulat nga gitawag encyclicals. Busa, dayag nalang nga ang maong pagtulun-an dili gayod nimo mabasa sa Biblia. Mao nga dili gayod nimo angay nga ampoan si Maria kay dili man siya ang atong manlalaban ni tigpataliwala.

Laing pagtulun-an mahitungod kang Maria nga supak sa gitudlo sa Biblia.

3. SI MARIA MIKAYAB NGADTO SA LANGIT (Assumption of Mary)

Ang pagtulun-an nga si Maria mikayab ngadto sa langit nagtudlo nga ang lawas ni Maria gidala ngadto sa langit uban sa iyang kalag ug espiritu. Sa Bibia wala kay mabasa bisan usa nalang ka bersikulo nga si Maria mikayab ngadto sa langit. Sa Bag-ong Tugon ang mabasa nimo nga mikayab ngadto sa langit mao lamang si Ginoong Jesus. Buhat 1:9-11

Sa Bag-ong Tugon si Jesus ra ang gihisgutan nga mikayab ngadto sa langit. Wala kay mabasa bisan usa nalang ka bersikulo nga si Maria mikayab sa langit.

Apan ang pangutana mao kini: NAN, NGANONG ADUNA MAY PAGTULUN-AN NGA SI MARIA MIKAYAB NGADTO SA LANGIT NGA DILI MAN UNTA KINI MABASA SA BIBLIA?

Sumala sa libro nga giulohan "Truth Encounter" p.143 nagkanayon, "*The most recent dogma concerning Mary is referred to as the "Assumption of Mary". It was defined in 1950 by Pope Pius XII. It teaches that Mary's body was taken up to heaven together with her soul & spirit.*" Kini nga documento mabasa usab nimo sa basahon nga giulohan " Roman Catholic List of Heresies p.8#4 nagkanayon, "*In the year 1950 the last dogma was proclaimed by Pope Pius XII, the Assumption of Virgin Mary...*" Kini nagpasabot nga ang pagtulun-an nga si Maria mikayab ngadto sa langit (Assumption of Mary) nagsugod kini sa dihang giproklamar kini ni Pope Pius XII niadtong tuig 1950. Kini nagpasabot nga before 1950 wala magtudlo ang Katolikong Simbahan sa maong pagtulun-an. Kini nga pagtulun-an usa ka klarong pagsupak sa gitudlo sa Biblia. Mao nga dili gayod angay nga ampoan nimo si Maria kay tawo ra siya sama kanato.

Laing pagtulun-an mahitungod kang Maria nga supak sa gitudlo sa Biblia.

4. ANG PAG-AMPO PINAAGI SA ROSARYO

Ang pinakasikat o popular nga praktis sa Romano katoliko nga nag-honor kang Maria mao ang Rosaryo. Ang Rosaryo adunay mga bahin niini nga naa sa Biblia sama pananglit niining mosunod: Naa diha ang Lord's Prayer (Mateo 6:9-13), Naa sad diha ang 15 ka Misteryo, apan 13 ra niini ang anaa sa Biblia ang ika-14 ug ang ika-15 maoy wala na sa Biblia, nga mao ang "*The Assumption of the Blessed Virgin Mary*" ug ang "*The Coronation of the Blessed Virgin Mary.*" Naa sad diha ang "Hail Mary".

Ang unang bahin sa Hail Mary anaa sa Biblia sama pananglit: “ *Maghimaya ka Maria, puno ka grasya; ang Ginoo anaa kanimo* ”(Lucas 1:28), ug ang pag-ingon “ *Bulahan ka sa mga babaye nga tanan, ug bulahan man usab ang bunga sa tiyan mo nga si Jesus*” (Lucas 1:42).

Mabasa nimo kini diha sa Biblia, apan kon basahon nimo kini sa Biblia dili kana pag-ampo, kondili usa kini ka greeting o pagtimbaya. Ang pag-ingon “ *Maghimaya ka Maria, puno ka grasya; ang Ginoo anaa kanimo*” (Lucas 1:28), usa kini ka pagtimbaya ni anghel Gabriel ngadto kang Maria. Dili kini usa ka pag-ampo

Ang pag-ingon “ *Bulahan ka sa mga babaye nga tanan, ug bulahan man usab ang bunga sa tiyan mo nga si Jesus*” (Lucas 1:42), usa kini ka pagtimbaya ni Elisabet ngadto kang Maria, dili kini usa ka pag-ampo. Ang ikaduhang bahin sa “Hail Mary” nga nag-ingon “ *Holy Mary, Mother of God, pray for us sinners, now and at the our of our death. Amen*”, gidugang na kini, dili na nimo kini mabasa sa Biblia.

Adunay duha ka mga rason nganong ang Rosaryo dili madawat isip usa ka pag-ampo kon Biblia ang imong basihan:

a) The Rosary is unacceptable as a prayer because it is addressed to Mary who is a human being like us. Prayer should be addressed to God. Lucas 11:1-2. Mao nga dili ka matingala nga diha sa Rosaryo ang pulong “Hail Mary” (Maghimaya ka Maria) kon wala ko masayop gibalikbalik 150 ka gihayon.

b) The Rosary is unacceptable as a prayer because of the constant repetition of words. (Ang Rosaryo dili madawat ingon nga pag-ampo tungod kay kanunay gabalikbalik ang mga pulong). Sumala ni Cristo diha sa Mateo ingon niini ang mga pagano kon mag-ampo. Mateo 6:7. Matud ni Jesus sa maong bersikulo nga ang pag-ampo nga taas ni gibalikbalik usa ka buhat nga pagano. Mao bitaw nga sa Biblia wala gayod kay mabasa nga gisugo kita nga mag Rosaryo.

Apan ang pangutana mao kini: NAN, NGANONG ADUNA MAY PAGTULUN-AN MAHITUNGOD SA ROSARYO NGA UNTA DILI MAN KINI MABASA SA BIBLIA BISAN USA NALANG KA BERSIKULO? Sumala sa libro nga giulohan “Truth Encounter” p.218#26 nagkanayon, “*The Rosary was introduced by Peter the Hermit in the year 1090AD*”. Kini nga documento mabasa usab nimo sa basahon nga giulohan “Roman Catholic List of Heresies” p.4#21 nga nagkanayon, “*The Rosary, or prayer beads was introduced by Peter the Hermit, in the year 1090AD. Copied from Hindus and Mohammedans*”

Kini nagpasabot nga ang hinungdan nganong ang Romano Catoliko mogamit ug Rosaryohan tungod kini kay gi-introduced kini ni Peter the Hermit niadtong tuig 1090AD. Busa kini nagpasabot kanato nga before 1090AD ang mga Romano Catoliko wala maggamit ug Rosaryohan. Diha na kini magsugod sa dihang gi-introduce na kini ni Peter the Hermit niadtong tuig 1090AD.

Laing pagtulun-an mahitungod kang Maria nga supak sa gitudlo sa Biblia.

5. SI MARIA ULAY SA KANUNAY (Mary’s perpetual virginity)

Sumala sa librong giulohan “Truth Encounter” p.137 nagkanayon “*The dogma (Mary’s perpetual virginity) says that Mary remained a virgin all her life, did not become Joseph’s wife, and never had any children by him. Her only offspring was Jesus...*”

Sa Biblia dili nimo mabasa bisan usa nalang ka bersikulo nga nagpabiling ulay o birhen si Maria. Atong hinumduman nga ang Biblia nagtudlo kanato nga si Maria adunay mga anak gawas kang Jesus nga Jose na ang amahan, kay gipangasawa man ni Jose si Maria. Mateo 1:22-25; Marcos 6:1-3; Mateo 13:53-57; Mateo 12:46-50; Marcos 3:31-35. Buhat 1:12-14; Juan 7:1-5; Lucas 8:19-21. Kining mga bersikuloha nagpamatuod nga si Maria adunay pay mga anak gawas kang Jesus. Busa, dayag nalang nga wala gayud siya magpabiling ulay o birhen.

Apan ang pangutana mao kini: NAN, NGANONG ADUNA MAY PAGTULUN-AN NGA NAGTUDLO NGA SI MARIA NAGPABILING ULAY NGA UNTA DILI MAN KINI MABASA SA BIBLIA BISAN USA NALANG KA BERSIKULO? Sumala sa librong gilohan “Truth Encounter” p.137 nagkanayon “*At the end of the fourth century, the Roman Catholic Church had already begun to teach Mary’s perpetual virginity.*” Kini nagpasabot nga ang Romano Katolikong Simbahan nagsugod pagtudlo mahitungod sa doktrina nga si Maria nagpabiling ulay diha na sa “fourth century”. Busa, dayag nalang nga before “fourth century” wala magtudlo ang Romano Katolikong Simbahan sa doktrina nga si Maria nagpabiling ulay.

Laing pagtulun-an mahitungod kang Maria nga supak sa gitudlo sa Biblia.

6. ANG PAGGAMIT SA SKAPULARYO (Scapular)

Sumala sa librong giulohan "Truth Encounter" p. 224 nagkanayon "*The scapular consist of two tiny pieces of cloth, generally brown, mostly worn by women. On one side it contains an image of child Jesus, on the other Mary's promise that any one who dies wearing it will never go to hell!*" Sumala usab sa basahon nga giulohan "Roman Catholic List of Heresies" p.9 nagkanayon "*Scapular is a piece of brown cloth, with the picture of the Virgin and supposed to contain supernatural virtue to protect from all danger those who wear it.*" Kini nagpasabot nga ang maong mga documento nagtudlo nga kon magsul-ob ka ug skapularyo sa imong lawas panalipdan kono ka gikan sa tanang mga kadaot, ug kon mamatay ka nga nagsul-ob sa skapularyo dili gayud kono ka mahiadto sa kalayo sa impiyerno.

Sa Biblia wala kay mabasa bisan usa nalang ka bersikulo nga nagtudlo kanato mahitungod sa pagsul-ob ug skapularyo isip panalipod gikan sa mga kadaot ni nagtudlo ang Biblia sa pagsul-ob niini aron dili kita ma-impuyerno inigkamatay.

Kini nga pagtulun-an dili gayud tukma sa gitudlo sa Biblia, kay sumala sa Biblia ang atong lig-ong tigpanalipod sa atong kinabuhi mao ang Dios dili kay pinaagi sa pagsul-ob ug skapularyo. Salmo 23:1-6; Salmo 91:14; Salmo 3:3; Salmo 7:10; Salmo 33:20; Salmo 28:7; Salmo 18:2; 2 Samuel 22:2-3; 2 Tesalonica 3:3; Hebreo 13:6.

Ug sumala usab sa Biblia nga ang makaluwas kanato gikan sa kalayo sa impiyerno kini pinaagi lamang ni Jesus dili kay pinaagi sa pagsul-ob ug skapularyo. Buhat 4:12; Juan 3:16; Juan 3:36; 1 Juan 5:10-12; Juan 14:6

Apan pangutana mao kini: NAN, NGANONG ADUNA MAY PAGTULUN-AN NGA MAHITUNGOD SA SKAPULARYO NGA UNTA DILI MAN KINI MABASA SA BIBLIA BISAN USA NALANG KA BERSIKULO?

Sumala sa librong giulohan "Truth Encounter" p. 218 nagkanayon "*The use of scapular was devised by Simon Stock of England in 1251AD.*" Sumala usab sa basahon nga giulohan "Roman Catholic List of Heresies" p.9#28 nagkanayon "*The Scapular was invented by Simon Stock, an English monk.*" Kini nagpasabot nga ang paggamit sa skapularyo gi-imbento ni Simon Stock of England nga usa ka "monk" niadtong 1251AD. Busa, dayag nalang nga before 1251AD wala magtudlo ang Romano Katolikong Simbahan mahitungod sa paggamit sa skapularyo.

PANAPOS

Angay kitang magpasalamat sa Dios kang Maria tungod kay siya ang gigamit sa Dios nga instrumento aron matawo si Jesus. Mao nga miingon ang Lucas 1:42 nga bulahan siya sa tanang mga babaye. Apan wala kini magpasabot nga bulahan siya sa tanang mga babaye nga imo na siyang ampoan.

Si Maria atong ihimplo sa daghang mga paagi. Siya ihimplo sa pagka-mapaubsanon, pagkamasinugtanon, kaputli ug uban pa. Apan wala kini magpasabot nga imo nga siyang ampoan. Kinahanglan ato siyang higugmaon sa biblikanhong pamaagi. Atong hinumduman nga si Maria usa ka magtotoo sa Dios, busa ang iyang kalag atua na gayud sa langit kauban sa Dios, apan wala kini magpasabot nga imo na siyang ampoan. Ingon nga si Maria nagdayeg ngadto sa Dios sumala sa Lucas 1:46, kinahanglan adto usab kita magdayeg sa Dios dili kay adto hinoon kaniya. Kon buhi pa si Maria karon, badlongon gayod niya ang mga tawo nga nag-ampo kaniya.

Ingon nga ang kalag ni Maria nagmalipayon tungod sa Dios nga iyang Manluluwas sumala sa Lucas 1:47, kinahanglan nga adto usab kita sa Dios magpatabang alang sa atong kaluwasan dili kay adto hinoon kaniya. Mao nga pag-adto sa mga maalamong tawo sa balay diin didto si Maria, Jose ug si Jesus, ang ilang gisimba si Jesus ra, dili kay silang tulo. Mateo 2:1-2, 10-11.